

不可勝數故能名動闕庭疊蒙獎眷非踐履
純實何以及此今夫世之人所以陷溺其心
者欲與利耳而公能斷然絕之其視財貨不
啻若涕唾然蓋其天姿過人遠甚故碑之無
疑仍繫之以銘曰

綦為著姓居海濱兮世載潛德生哲人兮天
與之性含元淳兮不雕不飾全其真兮有來
提警繁長春兮玄言秘訣授受親兮心去
智專精神兮始終一節無縉磷兮

聖皇鸞道起隱淪兮萬里逐師謁紫宸兮一
言止殺如其仁兮功塞兩儀孰與倫兮推其
緒餘淑吾秦兮餐和飲惠鷲猛馴兮列聖相
承教益振兮金冠鶴氅渥新兮高堂大厦
真且輪兮逍遙宴處終其身兮功成歆世乃
上賓兮往來脩然肘屈伸兮有不亡者壽無
垠兮門人紀德刊翠珉兮千秋萬歲仰光塵
兮

甘水仙源錄卷之五

甘水仙源錄卷之六

夷門天樂道人李道謙集

終南山重陽萬壽宮無欲觀妙真人

李公本行碑

李公本行碑在終南山重陽萬壽宮無欲觀妙真人殿前

釣六鰲於東海者不為鯢鱗而垂鈎採合抱
於鄧林者不為拱把而加斧苟志於大區區
細務不較也今觀無欲行實其超出物表之
志蓋類是歟公族姓李諱仲美原月山人父
珍職官醞有子四人公其次生於大定己丑
五歲始能步及長聰慧邁倫慷慨特達毅然
以正直自負里閭有狡獪者每正辭折之人
望而畏服嘗肆意酒間視舉世為不足玩年
三十七乃愔然曰與其汨沒塵塗中孰若擺
脫方外耶時全真教方行意欲從師而未知
所向適碧虛楊先生主重陽祖庭事乃往見
之碧虛素得人於眉睫間知其為玄門重器
然天屬所繫度其有難解於心者且令還歸
但勉以積善而已公抵家與諸親友決謝妻
子而去其妻訕之笑而不顧其父見而呵責

公婉其辭曉之以理性之事父徐省悟亦欲
向道乃同詣碧虛門下碧虛以公識量不凡
命名守寧及無欲子號公蓮頭弊衣行丐於
市時人謂之酒李先生日用間惟以濟人利
物為已任至於幽微之理允造其極大安庚
午秦境大旱居民阻飢公謂其屬曰餓殍如
此安忍坐視同邑趙三郎富甲關中公詣其
門備訴田里艱棘之狀趙悟乃發粟粟付公
賑賑公與齊志道等晝夜舂爨以給貧病日
不減百人井水適涸眾憂之公密禱于神鑿
泉得水設濟至秋斂而罷公素不欲彰名懼
人知已即日西行已而有司奏聞特賜趙為
潤國長者未幾入興平環居以十日為約其
靜中妙用見長安集至期渠河使夾谷公及
耆老數輩就環懇請以縣南龍祥觀委公為
主公諾之居五年至興定庚辰住終南樓觀
五年又遷京兆之丹霞尋蒙師旨主營建三
原碧虛觀事所寓之地皆有成規正大戊子
春碧虛於祖庭丈室謂公可以倚重舉以自
代關中接勳公及軍民避亂于南山糧盡人

相魚肉幾及我公或曰此酒李先生素有道者也因虜持出山遂得免焉庚寅春如南陽依附者衆會冲虛李公洞真于公在汴冲虛奏請住持并陽觀發已汴京款附于我朝俄而忽起異議無辜者皆坐誅公與一長老止水泊中迫於兇焰長老悚慄不能自持公止之曰我輩平日所行正為此耳死生常事夫何畏焉竟以事免城中絕糧人爭北渡津人固拒飢溺者以萬計公請洞真先登因以陰陽開諭津人餘皆獲濟公繼達新衛門徒望風輻湊今之靈虛天慶創成榮觀自此始也明年領衆適燕時清和尹公掌教每會道衆議祖庭緣事皆推公為能公謝不逮復奏請住持重陽宮兼任提點陝西教門事更名志述祖以傳贖公東行而歸過魯過魏自侯伯以下皆夾道抵迎有以庵觀奉之者有願為弟子者有以財施者公得之不以一毫私已悉歸之祖庭京兆田侯德絜聞公西歸督佐官就河中相迂以府城佑德觀歸之今王清宮是也時關中甫定暴狼相煽公以仁言誘

披稍稍格心比年南征俘摯來者不絕公詢其主有好善者多端勸諭引而歸道有不可必致者乃議貨取隨授以明文許其自便其感之深者終不忍去公嘗往來於祖庭玉清之間然規畫調度未嘗不拳拳於祖庭丙申秋受清和師書督祖師葬事掌教真常宗師又任以祖庭之職冬十月詔提點重陽宮再年秦士議修文廟闕瓦郎中邗邦用筮請於公公盡給之士皆稱嘆庚子春三月被旨特賜無欲觀妙真人號秋七月河北郝公總管家隸百餘陰謀南遁得其顯狀盡欲刑之公聞之連夜馳至其門以善言誨導亡者皆免明年城中群小數百結連私逸權府韓淵密知其情議尸諸市以令衆感公一言但殲其魁渠太傅移刺寶儉其母死欲以二婢為殉公以古葬禮正之始罷議凡契丹人以人殉死者弊因以革丙午春詔燕京作普天醮公預焉夏四月歸自衛汴京長官復請住丹陽棲雲王公具禮郊迎座中若有急色介諸徒速出人莫知其然甫登舟南軍已擁京門其

先見類如此明年還宮秋八月朝旨加玄微真人號尋又被冠服之寵甲寅春宗師以國家醮事具書招致年已八十六矣不敢以老耄辭比至堂下疾篤以後事付于法弟衍真大師張志悅以其徒拜宗師為大度師於長春方壺留頌而蛻時夏六月二十六日也諸徒奉柩西歸附葬于終南祖塋禮也葬之明年志悅命李志安陳志元具行狀請于宗師欲刻諸石道寧適有事于堂下宗師就命當筆且曰無欲領袖祖庭蓋有年矣今予代之始終行實子必熟知其文之也固宜道寧不復牢讓謹按無欲可見之行為之說曰有主持玄教之大人不可無輔翼玄教之仁人大人者正己而物正者也我宗師正容悟物天下羽士皆觀而化無欲公輔弼其教以仁存心俾祖師根本之地有隆無替可謂無負宗師春倚之意蓋公之為人稟剛大正直之氣持特立獨行之操傳授有源充養有地故施於事也無不濟之以仁遇患難則先之見人急難必盡力救援而後已有叩其修真之訣

者則以積累勉勵之其可與談性命事者每至夜分不寐雖與童子言亦諄諄未嘗倦至於名士大夫尤樂與交遊而相忘形骸與人接談又能度其高下而切中其機然且待人以約持己以謙其處衆也威而不猛和不流在環堵四五年間神變之妙欲直書之恐人以爲誕原其動靜語默之常亦可謂間世異人者矣故碑之而無慊乃贊之曰
偉歟李公專氣致柔其守也堅其行也周解紛庶務而善計不籌一志不撓而先爲之儔若人者將猷世擾攘而追帝鄉之遊耶吾知其了了諧緣而嗒然手歸休也

紫陽真人祭無欲真人

維大蒙古國歲合乙卯正月己亥朔二十三
日辛酉文生河南漕長兼廉訪致仕奉天楊
與謹致祭于無欲真人開元天寶若吳尊師
性質高鯁克慎攸履嘯月吟風嵩少之趾所
興善者惟李謫仙孔巢父爾若張志和號玄
真子浮家泛宅逍遙卒歲寓意於魚釣不設
餌曰陳少游寔觀察使曰顏魯公乃州刺史

杖屨往來迄今傳之以爲勝事與也何人浪
名進士職非顏陳才非孔李巖穴素契洞真
無欲兩翁而已旅舍京華適癸之巳天兵南
渡喋血千里十二都門閉而弗啓一死一生
誓言在耳頃承驛召入長安市洞真羽化吁

亦久矣真人既見傾寫底裏目電射人徹曉
不寐青山滿眼簿書紛委盛夏五月腦瘡作
崇夜半託君萬有不諱朝殞朝葬暮殞暮瘞
大限未終勉強而起真人入燕遽然猷世倏
聞計音老淚如水玉骨北還臥病桑梓剝琢
荆扉尺書踵至白馬素車遠涉清渭三真生
芻少酬知己儻念宿昔能不監止再見無時
伏惟尚饗

佐玄寂照大師馮公道行碑銘

虎 著 趙 撰

公諱志亨字伯通寂照其號同州馮翊人五
代瀛王道之後賦性明敏業進士年甫弱冠
府薦入京師就住太學兩赴內試不中適崇
慶兵亂還鄉以詩書自娛不復爲舉子計本
州節度使與屯肅請攝教授事公辭以不能

大兵西征公因北渡寓德興深居不出歲癸
未長春宗師自北闕迴道過焉公以其平昔
聖學浸灌之故至是爲真師感發之機一召
於外而已之天機立應於內鶴鳴子和森不
可禦尋即願奉几杖列門弟中乃先謁真常

真人爲先容真常一見莫逆於心遂引見焉
宗師亦不以常人待之既還燕一夕指公謂
二三尊宿曰斯人他日必能扶持吾玄門後
事也公默然銘於胸中後數載宗師將歸真
宅衆乃以嗣事爲請師曰我之託付伯通知
之矣不必復言長春仙去公謂清和真人曰
道教之興自開闢以來未有今日之盛長春
宗師人貌而天者也教門後事屬意在君豈
非天乎請毋多讓遂集道衆并達官貴族天
下大老便宜劉公之屬就迎於所居之靜室
請定仙號初清和閉門而不納公參戶而入
扶至堂上使衆羅拜堂下名位既正玄風大
振公之力也至乙未清和因祖庭事往闡教
於秦晉之間默遺公手書云于年運而往矣
老不歇心少不努力俱非所宜況四時之序

功成者去未成者來汝當果斷時不可不順公得書乃自念言真常攝行此事已十年知之者不惟玄門道衆上至天庭下至山野皆知之此蓋天也豈人私意所得而可否哉丁酉清和承詔還宮公乃取元初立清和彌縫扶護之禮按爲典故而行之遂立真常既畢清和乃以歸老之計逍遙於自得之鄉真常乃以無礙智慧進服教門之重任輔茲二真人終始進退俱不失其正者亦公之力也先是承詔教授胄子十有八人公乃於名家子弟中選性行溫恭者如其數爲伴讀令讀孝經語孟中庸大學等書庶幾各人於口傳心受之間而萬善固有之地日益開明能知治國平天下之道本自正心誠意始是後日就月將果皆克自樹立不惟俱獲重用復以才德見稱於士人又勸宣撫王公改樞密院爲宣聖廟命弟子薛德琚修葺武廟而守祀之又創建五嶽觀及道庵十餘處爲道衆修進之所庚子冬十月京兆太傅及總管田侯等請清和改葬重陽祖師以公爲輔行自燕至

秦三千餘里凡經過道家宮觀廢者興之缺者完之至百餘所其間公爲之記使刻諸石者亦十二焉祖師葬事既已復從清和還宮戊申真常大宗師依恩例賜金欄紫服遷充教門都道錄權教門事仍賜以今號蓋嘉之也及將立玄學公復以作成後進之心而贊助之直至有成甲寅秋八月二十三日示疾即真享壽七十有五二十六日葬之五華山之西南原禮也化之明日著因以祭文致奠禮於靈柩前門人薛德琚姚志玄執公之行狀求爲墓銘將刻石以表之著辱公之交爲最厚因知公爲最詳故不辭而爲之且真常之於此老一相遇便懽若平生遂引致博大人門下同著道家冠服又與築室於官之右而居之比至物化三十五年之間其相與往來者梁運使斗南陳翰林秀玉吳大理卿德明輩每論及當世人物至以宰輔之器許之其雅量高致爲可知已歷觀三代宗師所行之實跡則是靡有一事不相咨問不相假借而成之者又於化前後凡十數日數相

往來於似夢非夢之中豈亦各人曾次具理融會之地別有相得於形聲之表歟何其誠通氣合物莫能間而至於耶或者往往竊議謂同出身於儒之故茲蓋囿於私智之所見也化之後真常祭之曰與公相會三句有五不交以勢不聚以富憶初相見無言心許公今假化境出非人生死示跡孰知其神此豈囿於私智者之所能及也哉予故斷之曰如其不然烏得爲寂照乃銘之曰

堂堂佐玄博大無偏止水應物不隨物遷禮服智燭仁宅義路才德雖兼時則不遇華門圭竇終日如愚窮通有別聖道豈殊忽遇長春星拱北辰一惠發華德因日新孔廟躬修武廟繼綏文武之道將行有望公之所開豈小補哉贊成玄教亦卜大來荆金趙璧光而不耀英華外發誠明內照昔日非熊今學猶龍彼此一時不謀攸同刊之金石磨滅有終盛德流風云胡可窮

重玄廣德弘道真人孟公碑銘

太原虛舟道人李鼎撰

公名志源字德清號重玄子其先本上京徒單氏大定末遷萊州膠水居孟氏宅人因以孟氏歸之此亦古之因食乘地得氏者也高祖貺卒于汾陽軍節度使高祖完顏氏金源郡王希尹之妹曾祖克寧尚嘉祥縣主事

熙宗海陵興陵道陵凡四朝以功累遷至太師封淄王及薨謚曰忠烈祖斜哥拜世襲千戶終于南京副留守父給答馬復世襲千戶職母烏林答氏略以金國名臣傳考之其家世可謂盛矣況在大定明昌泰和間使他人處之鮮不為紛華之所流蕩公獨從髻亂中狀富貴而樂淡薄非性分上夙有薰習之力能之乎明昌初年饑即墨人高翔嘯聚劫掠詔命公之父討之乃曰食者民之天得之則生弗得則死抵死求生小人之常情討而誅之惡在其為民父母也遂宣布主上之德賑以倉廩不戮一人冠為之平古語有云活十人之命其後必有顯者是公能了此大事亦必借先世豐功厚澤陰相之力而致之耳公有三兄六弟其兄有官至驃騎者有至輔國

者餘皆克紹家聲泰和癸亥父母與議婚事公因遁去徑詣濰州玉清宮見長春宗師請為門弟子師憐其貴家子兼異其風骨不凡後必為玄門大器乃從其請授今之名字父兄疑其第四都全真觀主知之故為隱匿繫

歸有司公聞之遂還家自言其志父母知不可奪因選第二都樂真觀使居之樂真今更名玉清矣公雖得法於長春充養之際亦嘗質於玉陽太古二師真玉陽賜號開真子太安已已長春應詔京師還住玉清知公有所得乃賜重玄子號蓋慕之也貞祐癸酉公之昆弟皆為兵亂蕩散而父母夫依公乃扶二親就己所居致孝養之力三載雖二兄還其安置省問誠敬之禮未嘗缺已卯聖朝遣使宣劉仲祿起長春於海濱門人中選道行清實可以從行者得十八人公其一也及進程萬里沙漠其縹重車皆兩人主之惟公獨御焉清和憫其勤請副於師師曰吾知斯人之勤矣但欲先行其人之所難而後必有大所獲耳公聞之乃曰弟子於師丘山厚德無以

為報其僕其御實當為之事予惟不知所求亦不知為勞也同行者由是雖勤苦百至皆爭赴矣辛巳西至阿不罕山始有漢人耕作因公等九人立棲霞觀癸未住德興之龍陽甲申長春奉旨住燕城太極宮尋更名長春公亦自龍陽來丁亥師反真公年四十一矣一日靜坐一室忽於恍惚間見重陽長真長春三師真公拜畢侍立祖師言汝壽當七十五長春言汝五十後必負教門重任事雖繁劇汝勿憚是皆磨礪汝之砥石煅鍊汝之鑪冶也言訖不知所尋覺身中百關通暢真氣沂流身尾間入泥丸是後日復一日神物變化金漿玉液黃庭絳宮灌洗浸漬非言可及公因徧考先代師真得道之後身中之事著見於書者針芥相投矣公從此以來雖顯沛連次固不在其身中所得流運之理亦未嘗止想當時其為樂可勝計耶至清和真人掌教乃副知長春宮事俄遷知宮戊戌受官門提舉丙午遷宮門提點戊申權教門事已百以恩例賜金冠紫服并至德玄虛悟真

大師號癸丑掌教真常大宗師奉朝命晉度戒籙委公為監度師丙辰真常羽化誠明真人張公嗣教以公玄門大老之故已又在制遂授以教門都提點印俾攝其事戊午秋應丞相胡公之請主平陽黃籙羅天大醮尋奉今旨賜今真人號中統二年辛酉春秋七十有五矣度門人五百有奇宮觀稱是是年春二月二日順正而化前此數日預以後事囑門人凡來省視者見其耳聰目明音吐洪暢盡如平昔皆不之信至是方知公之所得過人遠甚越三日葬之五華山仙塋從遺命也至於度門人立宮觀茲皆緒餘土苴衆人之所共見者或可得而言之今壽幾八十矣而精神不衰臨行一著又明白如彼其素養之於內必有精真微妙衆人之所不能見之者豈易得而言之也送葬之日官僚士庶前祭後擁傾動都邑道衆不言可知秋九月門人狀其行請文於予予因按其實而次第之屬以銘曰

荏苒柔木言絳之絲大浸滔天砥柱不移二

者之美公并有之公既有之我請布之一遇師真便得正運觀公之性已超異矣及住大宮中正不倚四十年間又出類矣苟非其人道不虛行本若不立道無由生推公之孝及公之誠本既立矣道宜有成人所見者緒餘土苴公之得者妙絕真假天地一指萬物一馬不以是觀知公蓋寡與其觀身孰若觀神神如之何把握乾坤陰升陽降黃河崑崙至人妙處不屬見聞精神骸骨各歸本始門人治任奢儉合禮燕城之北五華之址碑以表之公元不死

渾源縣真常子劉君道行記

前 進 士 王 鷓 撰

君諱道寧雲中白登人世為縣吏以廉平稱君生不好弄間與諸兒戲必結庵跌坐曰我學道爾識者知其有宿習及長雅意玄門昆李凡四人君其伯也縣民推嗣世業力却之泰和壬戌聞渾源隱士劉柴頭號得道乃與家人訣詣屏風山金泉觀師事焉師歷試諸難至遣丐食君樂從不屑也師知可教遂授

微旨自是東遊海上西歷關中富華山上方之白雲宮屬歲饑僮餒立志不少衰既又如太原泊神霄宮有饒益院僧賢而飯之道獲楮幣千二百貫君榜求其主踰月竟不至悉以給貧乏而一無所私真祐之甲戌避地張村穴洞以居歲丙子鄉里稍安帖土官馮祿聞君之在并也迎歸雲內君尸居環堵若將與世絕者而樂道之人渴於請益百方為出之於是肩摩踵接學君之學者日益衆矣庚辰春渾源長高定飽聞君譽敬請之來曰龍泉曰金泉曰玄元皆名觀也君更為住持而興廢起頓之功為多癸未秋真人丘長春入觀回君執弟子禮進諸銀海之東目繫道存一見如故問君之初事以柴頭對師領之曰仙人中天隱也因授秘訣加號真常今築室西京未幾推為道官長遊戲十年庭無一訟建長春仙蛻清和紹休尤與君相得丙申之春尹清和謁相庭還會君於古恒嶽之陽語之曰吾近遊陝右奉田侯德祭之命凡玄宮道宇皆擇人主之惟華山之雲臺地靈物秀

實仙家一洞天非君無可託者君再辭不獲遂遣門人為經營君亦往返再三大興築構所過崇奉男女如市癸卯中夏田侯修華嶽廟復與丞相胡公天祿同署邀君於雲應閣君聞命欣然即日就途甫四三年厥功告成

丙午春有詔設普天大醮於燕京之長春宮編召諸方耆德而君亦預焉時李真人主醮事得君甚喜是年夏五月庚申旋車古恒越二十二日壬午請州牧高仲揀泊門人許志安屬以後事翌日將中曲肱而逝春秋七十有五君生長大定明昌間不以世俗所樂者嬰其心而能遠跡塵凡棲心物表東遊西歷所至風靡雖土木屢興聊亦應緣而已嘗作巴人曲接引於衆又著會仙隨應總仙三錄以道神仙可學之事臨終語門弟子曰可於丈室瘞吾軀榜以脩然足矣蓋取南華儵然而來儵然而往之義則君之平昔所養可知已方君之在渾源樂與學士魏公邦彥遊故其亡也門人史志經狀其行走燕求記于公且將刻石祠堂之側公一日携以過僕曰真

常好道人吾知之詳然吾老不作文字久矣子其代子言僕初客燕城殊無文思重違學士之請而復嘉志經之不忘所事乃以臨終之言名其堂因為紀其始末云若夫門弟之翹楚者皆當識諸碑陰茲不敢喋喋處疆圍

重玄子李先生返真碑銘

嘉議大夫吏禮部尚書高鳴撰

協洽清明前六日記
金朝故事新天子即位例出諸王為方鎮大安崇慶間宣宗以豐王來彰德先生時以高警家推擇為功曹掾有廉平稱尤精算術因之出入府中雅性重厚復小心畏慎故見親任至寧元年宣宗入繼大統明年車駕幸汴梁扈從以行補戶部令史當艱難之際柄臣高琪蔑視文吏其持下急如束濕從事者為之惴恐稍稍引去先生以直道自任氣殊不少衰會被檄漕米餽燕師抵霸州值北兵大入幾至不測然憂世之懇每見於顏間議者謂秩無崇早願力行何如耳若是而進武則功名爵位其畏不顯一日忽報謝病歸隆慮

山聞者愕然適與丹陽馬公之高弟盧公相遇便請執禮為全真師既付授有源未幾默有所契徑入棲霞谷無憂洞深坐練化木茹澗飲其節愈堅苦學道者難言之行元帥府宗室惟良招撫使杜仙皆一時豪傑日加敬

異在屯戍扞禦中嘗率僚佐致謁其他可知甲申聞長春丘公應召還附盧公遠送得賜名志方號重玄子盧公有北京之命謂先生緣在彰德俾之南行總管趙德用請住迎祥觀觀雖兵燹日久凡事草創先生一顧奠焉有承平舊物之漸丁亥長春公上仙携法衆往祭因宿留檀順若致心喪焉庚寅復還士庶逢迎懽動閭里皆曰吾家先生來也總帥蕭仲通暨同列奉疏請主盟天慶宮宮之荒廢略如始住迎祥時先生力為經度不數歲大敞而新之殿堂庭廡壇藏廚庫下逮廡福咸備而法規他郡邑為冠丁巳宗王穆哥崇向高風遣使持金冠雲錦羽衣焜耀之仍加真人號以庚申二月九日春秋七十有六怡然留頌而逝門弟子葬之王裕村某原從治

命也所著地元經若干篇行于世甲子春提
點趙志璞偕法兄弟持狀來謁曰先師寧神
塚上之木拱矣而旌紀寂寥誠惠顧之以銘
死且無恨敢請鳴以先生之行有應銘者蓋
先生少時已自不碌碌雖由文法進人皆以

遠大器許之卷六沉潛郎舊人依光日月君臣相
遇古人謂之千載雖方駕漢名臣可也乃今

挺然不顧槁項黃馘自棄於澹泊無端倪之
地以至成道非烈丈夫孰能如此以是槩之
真可銘也已若夫萬鶴遠醮壇而翔飛蝗抱

祭器而死虎承牒而殺田豕雪失道而作司
南其靈異類此者甚多皆先生平日所不喜
道亦不敢具書先生字友之相州安陽人初
諱益既入道止以法名行銘曰

貪黷悵悵不膠者臧在昔所難在我翁張城
旦刑書家令智囊顧乾龍未躍已麗乎初九
之陽迨雲霓滂然而從相得益章果以功名
自任於一代宗臣而有望政屑就代來之議
猶作封侯之宋昌胡舍彼而取此抑可謂有
天德沉潛之剛翩翩獨往澹與世忘擁腫之

與隣寂寞之為鄉是宜為下士所笑而耿耿
自信者廓乎其心光此孰得孰失計必有能
辨其詳或乘白雲或下大荒千年夜旦曾不
失處順安時之常有豐者碑植立墓傍繫捷
蓬之日雖樵童牧豎知有道者為不士

棲真子李尊師墓碑

嘉議大夫河東山西道提刑按察使王博文撰

尊師姓李氏諱志明字用晦棲真其號也世
為潞之壺關人以農為業祖考而上皆潛德
不耀甫九歲去父母為全真學初禮樊山潘

先生為師誦經讀書為童子事稍長遇超然
廣化王真人授以火候周天之法鍊陰為陽
之術久之覺有徵驗鼓舞踊躍不自勝乃曰
師真豈欺我哉自是益積日新之功遂事長
春真人命名與字愛之深所以教之篤始自

薪水庖廩及一切勞筋力役心智之事皆令
親歷而備嘗之然後誘之以至道之妙示之
以用力之方塵懇諄復不憚朝夕師亦力強
而志苦至脇不沾席者餘十年靜而生慧性
識明了伸紙引筆肆口為歌頌皆有理致長

春曰李生果為受道之器非餘子所及也居
無幾乃曳杖掛瓢徑歸太原葺保真觀居之
或寄跡於鄜肆或丐食於村墟觀化閱世人
無識之者但以單子李師父目之時方進取
國制未定戎馬營屯星散汾晉間劫攘財物

戕害人命者在所有之有司莫敢誰何歲庚
寅太宗皇帝南伐駐蹕并之古城師率徒侶
拜觀天光拈香祝壽上情悅懌因勅兵人有
暴民攘物者以軍法從事遂著為令由是行
者無擾居者晏然師與有力焉辛卯再駕而

南復蒙眈眈是後師之道價益重矣清和宗
師嗣教命管領一路道門事仍兼本府道錄
復以道體冲虛大師之號畀之未幾府尹石
抹公及道錄智公以保真狹隘疏請師住持
天慶故宮天慶兵亂後鞠為荆棘瓦礫之場

既允其請慨然以興復崇建為事一日從容
語徒衆曰度道士以守宮觀雖近代之制然
自漢武帝時於甘泉宮中為臺畫天地太一
諸鬼神像各置祭具自是之後蔓綿衍溢恢
張弘大以至於今其來遠矣吾道家者流雖

恬淡無為以治其心可不分祉祝釐為立
教之跡乎是則以營繕之事不得不盡心力
而為之也或有以功大難之者師曰古人有
言作舍道傍三年不成謀之欲衆斷之在我
即荷卷鍾為之倡從之者雲集貴者董其役

富者輸其財智者獻其巧壯者程其力師幹
旋運動於神明之中而應之者不愆於素遂
使天慶之規制雄碩俊整為一方之冠者具
見於榮祿宋公所撰萬壽宮碑茲故略戊子
夏大旱將為一路災府中祈雨僚屬以師主
醮事已而澍雨霑浹歲以大豐又宣差完顏
胡失刺暴得奇疾氣息幾絕家人走告師以
危殆狀躬詣其處呪杯水下咽復甦其精
誠之至感格之效如此平生不勝計所錄纔
一二耳已酉真常真人以師踐履之實洋溢

遠邇遷河東南北兩路道教副提點凝坐一
室中不動聲色而事無不集者雅為誠明宗
師所敬重中統二年即陞副為正越明年左
仙翁保奏於求寧邸即授棲真洪妙真人之
號方為人天所瞻仰遠爾猷世於至元丙寅

建子月之泱晨返真得年六十有七又明年
師之高弟提點張志希侯志正等請道教都
提點洞元大師申雲史繼主天慶事雲史即
師之同法弟也至元癸酉予方官太原適洞
元還自燕都將以是年四月已酉葬師於太

原府城之東南三里所從遺命也洞元持師

之門人郭志脩等所纂行實狀以墓碑為請

洞元與予二十年之舊也固辭弗許因請洞

元言尊師一方外閑人耳無猗頓之富無晉

楚之力徒以日積月累而歲以增加遂令荒

寒寂寞之域一顧盼之頃化為天上之玉京

平地之寶坊非德足以服人誠足以感物曷

以臻此莊子有言水之積也不厚則其負大

舟也無力風之積也不厚則其負大翼也無

力以師今日之所成就者論之可謂積厚而

有力者哉銘曰

維全不虧不虧何傷維真不偽不偽可常斯

道昭昭孰為主張得其人而遇其時遂川流

而天光僉謂若人福厚莫量心靜而明志堅

而剛內德既充道價日彰事之者煬龜爭席

師之者振衣升堂騰寶蜚聲佩蘭製芳砥柱
中流橫潰獨障遊赤水而得玄珠讀南華而
友子桑視人世之死生猶旦夜與陰陽遠猷
世而上仙返白雲之帝鄉顧雖蛻骨於此既
不足以喪吾存則又何必驚於凡亡耶

甘水仙源錄卷之六

甘水仙源錄卷之七

息七

夷門天樂道人李道謙集

崇真光教淳和真人道行之碑

嘉議大夫史禮部尚書高鳴撰

全真之教始於少陽君興於重陽子大盛於長春公長春傳之清和傳之真常真常傳之誠明誠明傳之淳和淳和以大元數之實為宗門五代祖諱志坦字公平出於相州湯陰王氏父諱忠性慤願以贊雄其鄉毋岳氏閨壺有微妊夢古仙來告曰此子成人必令學道否則將禍而家已而公生焉自童弁不好弄戲且不喜華羨物甫及冠即著道士服師北京盧尊師師乃丹陽馬公之法孫洞清于公之高弟也時以道錄居京之華陽宮盧素嚴厲少忤輒責誚之殆若官府然故居門下者鮮克終公參謁之餘力營百役至於廢瓦漏礎之細躬執靡有懈盧亦憫其勤而誠復加以禮癸未秋謁大宗師長春真人于宣德一見器之傳付秘訣既恐無以善其後遂行化與中義錦間日丐一食雖蚊蚋嘍敗

亦不屑棄已匪茹而居不計何地過昏暮即止戊子聞清和宗師駐燕知道統所在叅禮焉師愛其力行大加獎拔公忽有開悟恍若神明頓還舊觀無幾何徑入金坡坐而鍊化窮深抵幽木茹澗飲人莫見其面其志愈堅苦雖梅跡十餘年無賢不肖皆曰金坡王先生有道之士也甲辰春真常真人李公素高其玄屢以書見招來拜為大度師夏五月從真常北上叅受三洞秘錄以祈禳訶禁濟人其疾病藥石不可為者假符水或以袂拂之罔不立驗咸畏服其神

皇太后欽挹真風寵賚以禮公益自謙遜惟顛墜是懼每蒙慰諭必歸功於聖神若私不敢有者其知本不伐也如此留居闕庭者六年還燕為教門都提點燕去和林里千六百有奇凡赴十有七馳驅寒暑略無艱苦狀蓋以輔翼玄教為己任雖九死不悔也

先皇帝踐祚之元年龍集辛亥詔真常公佩金符馳傳祀嶽瀆以公為輔行繼而奉香代祭者又四皆以祈天衷命歛福錫民為意癸

丑上問養生之術對曰此山林枯槁之士所宜非天子之急務也天子代天理物當順天心與民興利則天降之福壽近大赦天下革故鼎新民樂生活開創以來戎橫天閔精魂無依非求諸冥冥中而莫之能救是所謂恩已及於八方澤又浸於九原矣因奏修黃籙普天大醮上喜曰天垂此教以利天下即詔公命真常公于燕之長春宮陳設醮事所須旅百俱出內帑一無擾於民食墨得甲寅三月十有五日禮備將行雲膚寸而雨公密禱於天天為之靜風月肅然星辰可摘又有卿雲鸞鶴之應公卿文士咸作歌詩以贊其瑞錄是道價益重一時貴遊悉奔走承事或執弟子禮真常狀世誠明嗣之公之力居多中統建元春入關旋及單懷陟天壇愛之留玉峯前期歲相州神霄宮久虛玄席諸者宿士庶懇公主之明年會真常葬又明年復入金坡至元改元燕人楊提領者素慕玄教於私第之後園作環庵一區願得天下清修高尚之士奉之僉曰金坡王練師可即禮致焉三

年冬誠明復以提點事懇公七年誠明上仙
今皇帝詔公襲位仍加真人號以九年十一
月二十有七日蛇形於長春之玄堂得年七
十有三越明年門弟子梁志安常志敏等奉
其衣冠寧神於金坡山下從治命也時天氣
肅冽比裏事熙熙然化而陽春執紼祖較者
萬餘人汗皆浹背咸嗟異之以謂純誠之驗
也所著信心錄六牛圖傳於世葬之明年志
安志敏等狀公之行來謁銘鳴治彰德時蓋
嘗以疏請公主神霄從遊甚款故習其為人
義不可辭公美儀觀愛讀書尤喜性理學深
得奧義好施與困乏無聊者不以己之有無
謙恭寬碩克已下人故度門弟子者數千人
若觀若庵者又營建百餘區可謂能弘其道
矣嗚呼以公平日陰功濟物之心嚮在闕庭
假之以政救時行道焉知不有知行符設醮
之功耶若夫將適遼東也禱之而愈風痺又
去許昌也空中傳玉帝有命其靈異若是者
甚多然實非公之本心且有淳和真人傳在
茲略而不書銘曰

混沌既死大道窈冥乃醜其醇乃濁其清契
詒以形勃礪以情拱壁而先駟馬竟盜為夸
矜天開聖人藥石聾盲著書二篇強為之名
爰有漆園演為鯤鵬蝶夢破而虛白生然後
使混沌復起大道復明代有人焉玄風日宏
有來重陽莫之與京孰其似之淳和是承挺
焉志堅夷焉心衡嗒焉尸居而聞望震驚寂
然無聲澹然無營眇翩翩而獨征砥柱中央
萬古不傾力提玄綱惟公主盟雖以符水藉
名而救世是宜羔鴈待之如老更金坡蒼蒼
草木光榮衣冠有藏功行有銘而復返其精
抑將乘泠泠之風御顛顛之氣遊元洲而戲
赤城也耶

願真冲虛真人毛尊師蛇化銘

宣授河南府路提舉學校官李國維撰

人命於天地兩間事莫大於生與死也自生
至死之際善惡所歸其可以見之矣且莫高
者天莫厚者地在天而日月有晦蝕在地而
山川有崩陷天地尚不能久有壞如此而況
於人乎乃知生不常存惟靜而復命曰常死

而不忘者壽蓋有道存焉耳自大道既隱人
慾滋熾不可救藥幸鍾呂而下降及近代全
真之教興有王重陽者出化馬譚丘劉於海
上相從往返東西二都仙跡顯著而後遠近
向風而流傳漸久彌滿四方遊其門而學者
不知其幾萬千人至於識性命之理了死生
之事而不失其所者蓋亦寡矣百年以來能
繼重陽七真之風而不下於今之高道動化
關洛間衆所欽慕卓然獨異者冲虛真人毛
尊師也師諱養素字壽之道號純素子願真
冲虛真人其師號也家世平水太常博士兼
秘書郎沁州同知毛麾牧達之嫡孫牧達以
文行純粹前金明昌初朝廷重其名特徵授
官教之職得其師道上下受益歷館閣通守
外郡於道無少違失宜其為天所佑有賢子
孫其父諱德字日新以門資入仕不喜躁進
師性資冲澹雅有出塵之志幼喪母事父謹
敬鄉里以純孝稱既長僑寓許昌貞祐初適
一羽客見過風神蕭爽師一見乃知其為異
人謹奉之久羽客曰此子可教授以秘語師

問仙號曰我華山陳希夷也言訖忽失所在自是心神渙釋道緣漸濃又於隱君子于宋二老時親言教以謙光處已實德接物乃父既即世喪祭禮闕棄家易服而道往禮太華忠照真人田無礙即丹陽之法嗣也謹執几杖清苦玄門幾二十年惠照異之丹書秘訣又得其傳天光煥發日以益新殆不可掩因志在四方不為物滯門人常志久系出素宦方監永寧務棄官入道同諸貴遊請師居鳳翼道院一日其子尋訪既見堅乞還歸師却之曰吾既在道門去就自有時終不能為世俗累爾無顧我子號泣而迴後天興河南之變大朝王師南渡因復姑汾時官府道俗交狀敦請同法屬王葉諸公棲霞党子春住持玄都觀當其晉境飛蝗滿地民心懸急師率王葉董齋戒致禱蝗悉飛去竟不成災人以爲靈應昭然精誠所致莫不尊敬之但福地靖廬未能全忘其情乙未同諸門人常志久由陝而南興葺洛陽朝元棲霞二宮及華陰清華觀不數年金碧輪奐冠於他處丁酉汝

州官府狀請住北極觀已亥關洛荐饑豪富閉糴師悉發餘糧均施困餒賴以活者甚衆蓋平昔樂於矜念以仁爲己任如此辛丑清和真人至終南以師宿德望重起爲棲霞提點兼領披雲玄都寶藏八卦局時紫陽楊使君行漕臺暨玉華王元禮西庵楊相正卿諸公俱在洛與之遊相得甚厚道價增重光耀一時甲辰副提點寂照大師吳志明北上齋皇后懿旨有冲虛大師之號繼及真常掌教大宗師銜命南下賜號順真冲虛真人既莅琳宮主盟師帝薰戒嚴肅日無惰容庚戌舉燕京道錄韓公以自代退跡清華未幾韓復歸燕棄世再奉掌教誠明真人法諭復領朝元棲霞宮事師於性理之學尅意終世斯須無少間斷故能透脫融貫全真正脉其造之也不爲不深一日炷香危坐即示歸寂之語衆莫能測翌日晨輿方理中憤既畢依墻儼然立化神觀不衰是日朝霞亘天人有見師翔翔其上者士子伊川楊君用登封韓仲溫因宿於宮嘆以爲異實己未七月上旬四

日也世壽八十有二凡聚徒闡教前後度門人百數輩其遺骨瘞葬於本宮之先塋關洛諸公多爲作傳及賦歌詩挽諫之有汎霞圖卷傳於世翰林待制孟肇麟京兆教授李庭叙之甚詳門弟子王志冲張志佺同道判常志久齋講師郭從道所作行狀謁余求誌辭不能已余以謂甚哉道之難明也其道有成不成由其人之悟不悟故前聖有道心唯微之旨亦有謂朝聞道夕死可矣之語皆不以達道爲易其所以悟而成者誠亦有所由來必也所稟賦高明所遇合神異所以抱神守一甚固積行累功甚勤自種時一點物真力耕教耘善始令終然後可望入其闡域矣師生於姑汾長於賢祖考積慶之門得天地之間氣其稟賦不必論也隱於許下遇希夷許以可教遂授其妙道入太華禮田無礙授丹書其遇合可知也內持孝敬以事親奉天外施慈仁以愛人及物此非積累之功行乎隱居華之下洛之濱清淨虛寂餘四十載有進無退此非抱神守一甚固者乎故卒能有成

脫塵網之中出化機之表脩然往來入於自在逍遙之境界不亦宜乎後之學者可不景行而加諸意抑謂自大朝奄有天下以至中統改元當今皇天眷命

皇帝暨后妃太子諸王莫不敦尚玄風敬禮

高士而師之所歸至善若此不可不為之銘

銘曰

太古之時人生之始壽而不夭仁而不鄙大道既隱衰俗靡靡滋熾人慾泯絕天理輕妄好惡勞煩聽視真趣之歸幾人而已在清流中有純素子忘情名利遠跡朝市養氣煙霞棲身山水伊水洛水嵩山華山徃求同志密叩玄關當擾攘之際倘徉乎其間吳過高真逸駕相攀傳授秘訣煨成大丹輟食調人救時阻報內持外修功成行完策名紫府垂範黃冠塵緣方盡馳馭將還幻身外物付之等閒汎寶璣空眇視塵寰陳跡在碑有志明刊善始令終衆之所難不歸於地府不列之王官生死無變於已而況乎利害之端豈亦不幾於神仙之一班後人仰止拂石以觀

終南山圓明真人李練師道行碑

祖庭天樂道人李道謙撰

師姓李諱志源邠州三水縣人天挺至性宗黨以孝悌稱自幼有冲舉志年未三十考妣俱喪乃棄家絕累深身入道師事本州王峯觀全陽周君服勤左右數年匪懈全陽憫其精懇遂付以修真微旨且使遊歷諸方參證心印至醴泉與同志裴公結茅以居遣欲凝神虛心集道歷十有八載故得塵慮盡銷天光內發鄉人李公崇尚高潔建道院率閭里著艾延至事以師禮無何全陽召之還邠賜號圓明子俾主玉峯觀又嘗集衆言曰圓明於道實有所得他日吾歸全之後汝輩當尸祝之迨正大戊子冬十月全陽返真門衆遵宿昔之命舉練師處師位練師勉從其請未幾遷居京兆府城之西漢高祖廟凡昆季子姪教育公溥遠近道屬靡不得其懽心始服全陽付畀得人之哲天興初秦地受兵練師挈衆出關寓陝州之難足山尋遷洛陽長生觀及河南破天朝遣使招集三教人練師率

衆北渡於東阿縣築栖真觀居之遠邇聞其名德之重請益受教者不可勝紀玄通子范尊師方主東管道教事待之如伯仲時遣人候問起居資其不給甲午歲關輔畧定練師念及終南山時村活死人墓乃重陽祖師鍊真之地曩者全陽意欲葺居以彰仙跡適丁金季之亂不克肯構即遣門人王志瑞等西歸耕占乙未參軍齊大年與練師鄉里之舊時居趙州慕其道德躬悟真庵請至事之百色用度繼奉不輟丙申冬適燕謁處順堂學教清和宗師遇以殊禮署練師充真定路道門提點且曰吾向詣長安祀香祖庭見公遣人矧制南時勝跡吾就名與重陽成道觀矣然此非細故公儻不親臨恐莫能濟練師還趙之日繼令法弟吳志恒來充知觀戊戌冬京兆總管田德榮差官持疏往迎練師即日命駕率百衆西還大行起建由是道緣益弘門徒翕集不數年殿宇壯麗與宗聖上清遇仙諸官相甲乙辛丑春祖庭會葬之際道流恒數千人洞真宗師舉練師提舉重陽宮練

師以正已而物正之道禪贊玄化與有力焉
 丙午八月朔旦朝謁禮竟忽謂眾曰吾昨承
 玄告不能久留世矣公輩各當以進修為業
 及此師祖勝緣實先師之志今克伸之吾歸
 無嫌矣可善主持無使中道而廢遂絕粒忘
 言越五日沐浴更衣奄然解化春秋七十有
 一門眾葬于本宮東北之仙瑩庚戌冬掌教
 真常真人奉上命委加玄教有道之士名號
 以恩例追贈淵虛圓明真人仍升觀為宮於
 戲盛哉練師道器凝重上性謙冲律已容人
 輕財重義生平不讀書凡視聽言動脗合經
 旨當作務紛擾之甚其修鍊之功亦無時少
 鞅丈室之中惟巾盂几杖無長物一冠一袍
 之外不置囊橐終日塊坐殆若與世相忘者
 及其即之而飲人以和使人自有所得其教
 誘後進又能隨其根性高下各有所發明無
 非順神毓氣誠意正心之要雖髫童之愚所
 為不道亦未嘗以惡言斥辱但以善惡罪福
 之報方便啓導之必使心自慚服以馴其化
 其成就於人者如是至元癸酉秋重陽日提

點其志恒每念練師薰陶切磋之惠思而不
 忘丐子為文用刻貞石以垂不朽向予與練
 師同居仙境僅及十年仰慕高風亦樂道其
 盛德仍系之以銘銘曰

真常之道無門無房誰其啓之教祖重陽東
 遊海上四子傳芳支分派別化洽萬方圓明
 老仙天挺道器丹陽裔孫全陽嫡嗣久進真
 修功周德備或出或處有道有義仙仗西來
 肯構南時門徒濟濟教化熙熙樓觀峩峩金
 碧參差聲聞神宇萬世之基善始今終曲肱
 欽息形有生化道無終極我銘以辭無愧乎
 實刻石琳宮後昆懿則

清虛大師把君道行錄

翰林侍讀學士正議大夫兼國子祭酒陳楚望撰

國家尊右三教道其一也為教者思寵遇之
 優渥而歸美報上之念亦與國家相為無窮
 是以道家者流必躬宮殿集徒侶崇奉玄昊
 晨夕焚修以為
 皇家祈天求命之地此乃天保下報上之遺
 意而通明殿之所以建也天下之理通則明

人心本自虛明洞達一為外物所蔽則明者
 塞矣塞則暗莫甚焉夫明必本於通不通未
 有能明者也此通明之義是宜清虛大師把
 君以是銘諸心而又以是名其殿也君諱德
 伸字仲直世居唐邑幼而好學事親以孝聞
 學廣聞多而以老氏虛心體道之要為入道
 之門戶值貞祐南遷挈家襄陵十餘載二親
 相繼而逝既終喪欲訪異人辭故里南遊至
 蒙山受道於無塵子衛君無塵甚器重之為
 立今名字自此黃冠野服惟意所適晚寓青
 社養素於太虛宮先是有同門高士王君於
 府城東南隅卜建觀基欲居雲遊之衆城東
 二十里許購田園以備香供之具一旦遇仲
 直道同志合悉以其地相付與且曰成吾志
 者子也仲直躬率羽流銳意締構是時總管
 于公元帥姜公及諸方信士隨心樂施助成
 勝事崇通明之正殿立玉帝之尊儀方丈雲
 堂齋廚庫庖廊廡雜舍以序營為一新偉觀
 落成之後每遇朔望自總管以次官行香致
 禮以贊頌天子萬年之祝其歸美報上之一

念必使無負於尊右之初意此仲直之本志也玄門掌教大宗師真常真人名其觀曰通玄仍付以金欄紫衣號曰清虛大宗師誠明真人特授益都路道錄歲次乙亥朝廷遣使徵召留長春宮每事屢有咨訪特旨遷授提

舉諸路道教以彰有德昔河內司馬子微受中嶽體玄潘君正一之法體玄受之於茅山昇玄王君昇玄受之於華陽隱居陶君自陶君至于微歷四世而子微被召於唐景雲間乃以治國猶治身之說納誨於睿宗自丹陽宗師以是道傳之元元宋君元元傳之無塵子衡君無塵子傳之仲直亦已四世而仲直以有道榮膺召命他日奏對必能以正心誠意開物成務之學啓沃聖心其視子微治國治身之語殆異世而同符矣仲直老名而儒行者也余與交最久頗知出處之大槩併筆之以遺後之嗣教者使有知焉至元庚辰正月吉日記

終南山樓觀宗聖宮同塵真人李尊師道行碑

宣授陝西五路西蜀四川道教提點李尊師李道謙師姓李氏諱志柔字謙叔其先洺水人世業農桑以門地清白見稱於鄉里昆季四人師其次也生有宿慧及長雅好林泉蕭然有出塵之趣父志微素嗜玄學先從趙州臨城縣

太古高弟開玄真人李君參受全具教法及學成行專所作歌詩深契玄理泰和辛酉歲師亦事開玄執弟子禮服勤日久開玄識為受道器真筌秘訣付授無所隱師既蒙印可自是鍊心養性巧食刑洛間雖絕粒數日立志不少衰尋隱居仙翁廣陽兩山謝絕人事者十有二年潛究道德性命之學大有所得是時開玄及志微俱上仙其兄志端弟志藏志雍皆從師遊蓋相尚以道也已而西山盜起遷邢臺築通具觀居之道價日隆遠近向慕願為門弟子者戶外之屨嘗滿庚辰春聞長春宗師拔起海隅道經燕趙師以禮餞行迨癸未八月長春奉詔南下師復還於宣德之朝元觀長春以師頌德宿望賜號同塵子教以立觀度人將迎往來道衆為務師恪遵

玄訓於是始建長春於漳川奉天樓真於大名丙戌復詣燕觀寶玄堂參證心印明年秋長春返真師杖屨南歸向化者益衆如磁州之神霄相州之清虛林慮之天平廣宗之大同燕都之洞真皆以次而舉其門弟諸方起

建大小庵觀二百餘區化度道流稱是丙申清和宗師自燕入秦興復終南劉蔣祖庭時師亦侍行適樓觀宗聖宮道士張致堅以廢址係玄元道祖演道德二篇聖蹟天興兵亂焚毀殆盡具狀懇宗師乞為重建計宗師以為無丹山豈能樓彩鳳有任公乃得馱大魚即以狀付師俾任其責師奉命率徒剡荆蕪陶瓦甃經之營之日漸成序丁酉冬真常宗師署師大名邢洛兩路教門提點暨清具大師號俾往來秦魏趙間以辦其事不十載雄樓傑觀粲然一新庚戌洺州牧石德王慕師名節詣闕保奏賜黃金冠服加號同塵洪妙真人甲寅春詔燕京大長春宮修普天大懺師預高道之選事竟盤桓邢洛諸觀院有未完者例為補葺中統癸亥誠明宗師命督還

樓觀凡有闕略悉加修飾方之前代增益數倍矣至元改元奉德音禁民侵擾及使臣軍旅無聽留宿以便焚誦三年丙寅夏六月二日沐浴正襟儼若平日集衆於前戒以修身利物為念以後事嗣弟子石志堅主領翌日脩然順化享年七十有八方其歛息之際官北焦家巷居民見空界五雲浮動仙音朗徹奔往視之師乃昇矣畏暑流金顏色如生醮祭三日權瘞於所居之丈室既事遣介赴喪於東門人忽一日大名奉天宮群鶴飛鳴下直壇殿衆目仰瞻須臾訃音至識者以為師之神遊也後四年庚午門下諸者宿卜以清明日葬于宮東南成道觀之仙遊堂師純素誠敬終日危坐望之毅然若不可犯逮其即之教人不倦皆蓄養精氣神之秘其次則必以退已進人罪福之方隨其高下接引之誕惑幻怪之語不道也雖應緣世務中其願真毓浩之業未始少間輕財重義慈儉謙裕殆若夙成四方學徒不可勝計歲時供奉金帛充溢悉歸常住為興建費衣冠之外囊無私

積故能享其壽致高名所至之地權豪士庶莫不拜禮敬北面師事之自非胸中誠實所格疇克爾耶以予嘗辱知於師比其葬也石君志堅狀師平昔所行大槩懇來乞文將刻之石予亦重師之有道不得以固陋辭即

因其實而紀之銘曰

希夷道妙言難窮誠之所感斯能通粵有人兮宿慧充開玄竊嗣同塵公早年頓悟超樊籠仁慈清儉居謙冲志龍交媾全其功鍊就骨肉俱相融今名籍籍聲靈萬所在請益來

參同西翔東翔開宗風隨機接物開首聾草樓灰燼施神工瑤壇玉宇增興隆功成道備師知雄退身閑居德愈崇百年猷世遊太空昭昭不亡存其中我作銘詩樹琳宮高天厚地齊始終

洗燈子然先生道行碑銘

翰林院學士中大夫陝西華州人洗燈子然先生

道者者流蓋逸民之徒歟語其心則冲虛清靜語其身則落魄不羈語其情則愛惡俱遺語其志則持守不移其設教也不娶不宦不

葷不垢慈而祥貧而樂和柔謙退而已所以老莊於周鍾離於漢呂仙之於唐繼繼承承而不世出也其簪冠模範心跡塵俗者姑置而勿論金源氏作重陽祖師飲甘泉而了道丹陽馬師遇重陽以修真趙玉斗法嗣於丹陽洗燈子光續於趙斗教法大闡而關中為最者洗燈師與有力焉師諱逸期字守約姓然氏京兆涇陽人大定辛卯分瑞于世骨相異常弱不好弄及其長也神注于顏髯過于腹澹然寡欲樂慕玄風父母欲妻之誓而弗許遂棲清陽子桃花陳先生為師灑掃叩詰盡瘁服勞雖經叱訶責辱未少退惰晝不懈夜不寐者凡六寒暑矣清陽子曰汝雖經鍛鍊功行未圓若非明師指訣詎可入於大乘東山道人與汝有千劫緣當往叅禮力遣之乃謝去至驪山遇了真子趙公方悟陳師之言久矣仙機默有所契了真子曰靜功垂成更加勸勵可也長安太白延祥觀乃唐朝玄元道祖示現之跡吾丹陽師已為建立全真堂於其側他日必為大福田汝可識之即日

西邁過醴泉邑人留居環堵遂乃踵納真息
內杜德機棄智忘言識心見性不三年造夫
大妙之域一日火光從環堵中出衆以為災
奔赴之至則見師瞑笑而坐衆感而異之方
悟火光乃神光也於是敬仰禮奉倍於他日

師狀其煩瀆出遊商顏卜築三陽草庵以止
息焉字其庵曰還真三陽地勢高迥泉素艱
得師指其震隅曰泉其在此乎發之泉果涌
出甘冽如飴遂賦詩曰一陽初動震天關須
信還真地有緣昨夜乖龍轟霹靂遶潮海眼
出寒泉居十歲聞望益彰門人大集鄉之善
友敦請西遊遂赴了真師所囑太白延祥觀
而住持焉士庶參謁曲盡誠敬持紙幅懇求
翰墨者比比也或者解色頗倨即書二詩付
之持歸披讀了無一字翌日再詣師席具白
其事師笑曰爾元不曾閉眼再讀當有所見
展而視之墨跡儼存驚悔拜謝而去節度使
曳刺金紫之在鄧也病篤夢異人飲以法水
寤而即愈命工繪其像晨昏敬禮焉聞師歷
商過鄧使數人邀於路至則駭曰乃夢中所

遇之異人也出像示之惟蕭師知其意識論
以詩曰憶昔垂綸逾四載至今猶自不吞鈞
可憐笑殺離頭鷺辜負寒江一葉舟金紫拜
而受之歲壬辰秋七月居浙川召門下楊志
堅張道性語之曰比歲暮吾將行矣其年冬

十一月二十八日命道侶次第而坐曰諸公
盍為我餞行因令高歌起舞時及四鼓乃留
頌曰四大元無主包羅物外身壺中天地好
歸跨紫麒麟頌畢擲筆端坐而蛻春秋六十
有二乃卜服餌谷之兆而權厝焉越明年門
人白志柔等欲改葬樊川了真師仙筮之次
焚香啓柩面如生亦足以表其平日修鍊之
功矣至元癸未冬十二月嗣法提點趙志暉
提舉王志靈知觀李道和輩持師道行之狀
介道交通真子乞文於予曰吾師襟靈明爽
虛室生白經文洞曉肆筆成書曩昔著述歌
詩幾四百首引援門弟子無慮千餘人墓雖
有誌若非道行碑銘恐無以白于世而壽于
後也予感其求請之懇乃為之銘曰
維鍊金兮純粹其精維質玉兮瓏玲其聲德

參乎兩儀秀稟乎五行言乃夫口而發書乃
肆筆而成降龍伏虎兮翔翔乎河洛七八之
數乘風御氣兮逍遙乎鷗鷗九萬之程其來
也孤雲其去也迅霆孰知夫洗燼莫測之妙
盍視此翠琰不朽之銘乎

通真子秦公道行碑銘

遺山真隱元好問撰

通真子諱志安字彥容出於陵川秦氏大父
事軻通經博古工作大字為州里所重父諱
略字簡夫中歲困於名場即以詩為顯門之
學自號西溪道人殊有古意苦於雕琢而無
跡可尋一時文士極稱道之生二子通真子
其長也自早歲趣尚高雅三舉進士而於得
喪澹如也貞祐初避亂南渡西溪年在喜懼
親舊以祿養為言不獲已復一試有司至御
簾罷歸正大中西溪下世通真子已四十遂
置家事不問放浪萬少間稍取方外書讀之
以求治心養性之要既而於二家之學有所
疑質諸禪子狀其推墮滉漾中而無可徵詰
也去從道士遊河南破北歸遇披雲老師宋

公於上黨略數語即有契乃嘆曰吾得歸宿之所矣因執弟子禮事之且求道藏書縱觀之披雲為言喪亂之後圖籍散落無幾獨管峯者僅存吾欲力紹絕業毀木流布有可成之資第未有任其責者耳獨善其身曷若與天下共之通真子再拜曰謹受教於是補完訂正出於其手者為多中間奉被朝旨借力貴近百方並進卒至於能事穎脫真風遐布而通真子之道價亦重於一時矣通真子記誦該洽篇什敏捷樂於提誨不立崖岸居玄都垂十稔雖日課校讎其叅玄學受章句自遠方至者源源不絕他主師席者皆竊有望洋之嘆焉藏室既成之五月謂徒眾言寶藏成壞事關幽顯冥冥之間當有陰相者今大緣已竟吾其行乎越二十五日夜叅半天無陰翳忽震雷風烈大木隨拔遠沐浴易衣蛻形於所居之樛櫟堂得年五十有七弟子李志實等以丁未年月日奉其衣冠窆神於天壇之麓披雲之命也所著林泉集二十卷行於代徃子先君子令陵川子始成童乃識通

真子之大父開居嵩山與西溪為詩酒之友者十五年通真子以世契之重與予道相合而意相得也故志實輩百拜求為其師作銘今年春二月劉志清者復自濟上訪予新興水雪互寒跋涉千里其勤有足哀者況於平生之言乃為作銘銘刻之松臺其銘曰

昔在窮桑發真源鑿民耳目神始全遭罹元二坤軸旋壞劫欲墮未開前道山絕業疇當傳百於莖芻了大緣若有人兮靖以專嚮也易老同初筵玄綱力挽孰我先苦節終至孰我堅網羅落簡手自編寒暑不廢朱黃研琅函瓊笈閱九淵垂芒八角星日懸司功會計盡上遷乃今出瓶鳥飛翮安常處順古所賢死而不亡豈其然華陽九障名一焉豈不委形殆賓天為復延康轉靈篇為復彙珠叅七言為復虎書校三元為復逸度論九玄寧當裛蹄燒紫煙寧當麟角煎集弦寧當千家課芝田寧當七祖歸枯禪松臺有銘閱千年我相夫子非頑仙

恕齋王先生事蹟

先生姓王氏名粹字子正北平之巨族也才高而學贍少有詩名每一詠出膾炙人口然與世踈闊不事舉業正大間薄遊鄧下時漆水公節鎮唐鄧喜文章樂與士夫遊故中朝名士多往依焉先生亦客其門會天兵南下民遷襄陽先生亦漂泊江漢間甲午揚侯彥誠被命招集三教醫士等流一時士人皆得保其妻孥復還中國楊侯獨迎先生至燕遇真常大宗師即北面事之執弟子禮居長春官具常遇之甚厚復以上世師祖本行屬之為傳將藏諸秘笈以求其傳先生遂居萃玄堂研精致思旁求遠索紬繹而編緝之年四十餘以癸卯九月無疾而逝不決旬而見夢於誠明張君其云為歎曲不異平昔少焉作詩而別云當時每恨花開早及看花開花已老花落花開能幾何回頭又見春光好諸且誠明以所夢之詩白於真常宗師真常嘆曰子正仙矣聞者異之先生為人性恬澹無機構廉潔貞介與人交悉待之以誠聞有道行者雖窮居陋巷必親之嗜讀書作文尤長於

詩其五言雅淡有陶韋之風焉

訥庵張先生事蹟

先生諱本字敏之觀津人幼年與真常李真人為同舍生初真常之入道也先生以嗣續規之既知牢不可奪乃各言所志而訣貞祐二年先生中詞賦高第平生工於大篆及八分作詩殊有古意正大九年以翰林學士使北見留遂隱為黃冠居燕京長春宮僅十年時真常掌道教兄事如昔盡禮給養之後遊濟南儵然而化

甘水仙源錄卷之七

甘水仙源錄卷之八

夷門天樂道人李道謙集

純成子李君墓誌銘

宣統庚申五月提學李蔚慶之撰

講師李君汝其友申公都提舉以告且曰講師操履堅正德業冲粹人所共知臨終以後事見託經營宅兆今已安措不有銘辭無以慰諸幽願詳其所聞而誌之講師諱志全字鼎臣太原太谷人少業進士父洵直以經義中明昌五年第講師挺志不群守箕裘之舊孜孜講習視富貴如探囊中物也當立之年不意世變干戈日尋無復進取遑遑如也當時天子好長生之道不遠萬里召見丘長春賓禮至厚玄風大振聞者皆與故講師所以歸心依河陽張尊師為引度長春西迴策杖徒步謁見于奉聖龍陽觀授以道妙暨諱名自是山居有年名聞籍甚其後東萊宋披雲以所在道書焚於劫火奉朝旨收拾於灰燼之餘散亂無復可考求博洽異聞之士俾校讎之迺得講師始終十年朝夕不倦三洞靈

息八

文號為完書功亦不細教主李真常奉恩例賜公純成大師提舉燕京玄學未幾復還天壇舊隱徜徉巖壑將終老焉忽以昇聞中統二年六月日也享年七十有一平昔著述號耐泉集三十卷行于世又集七真及已下諸師詩賦二十卷目曰修真文苑嗚呼士嘗論之以君才學取一第不為難矣世方擾攘河朔尤甚自保不暇度日如年壯志衰謝甘埋於塵土誰為知者泯滅無疑也迴視埋沒于草萊湮滅無聞者為何如哉乃作銘曰

于嗟純成幼戴儒冠讀書幾載校藝秋官誓將一舉九萬鵬搏運有定厄世無常安憺然學道秉心如丹長春西迴景星爭觀徒步千里一見相惟授以道妙佩服馨蘭苦心修鍊幾換炎寒要遊王京此事無難三洞寶典灰燼遺殘校讎十稔書始為完拂衣高蹈雅志林巒却歸舊隱終老盤桓無何仙去聞者悲酸刻諸琬琰過者詳看當知道中自有鳳鸞

洞觀普濟圓明真人高君道行碑

安西王府文學姚燧撰